

ANNABI MUSA



The history of Moses in Shanga as recorded in the Ataula, the second book of Moses: Exodus 1-20.

BOÃ

Musa lalahu hwaabõabo

Nindekpaã Isra'ilaãma Masa

Isra'ilaã tá à wèe Masa à je Yakubuzo, koji ì baa gbãiazò toã di: Lubainu, Saminu, Lawi, Yahuda, Ishiaka, Zabaluna, Biliaminu, Dã, Nafatali, Gada, Ashilu. Yakubu boiina be kõn ka'aa wokoi. Yusufu be kîn ì bee Masa kɔ yãa. Di Yusufu gà ì dajiãzo ì lokaci gbãiazò kõn. Isra'ilaã ni'è à laakè à kè dake gbagba, à wàzã tee beũ.

Kii dee tá Yusufu tà dõa kiike shì Masa, di ibe hè ì gbãian: À Isra'ilaã wa, à kè dake à dàwala. Wà wee wà seseke'èè dun àba laakea. In jèè kpàtee, à kashikõa wa gaabajeãma, à jèèkeawazo, à boa wa teeũ.

Di wà gbãia jè'èè à baanajeã, à à nindekpa jii gbadazo. Leen à hwaa tá wàta ke Pitomuzo Lamashezo jè Fili'aunan ì mabenakaaguã. Amaa lata à nindekpa'àma leekpèe bee, lee à laakè, à wàzã teeũ, di Masa gbãia tòsã à yãaji. Di wà à dà zɔɔjii

zezekeũ, wà à gbēeshikè, wà tēebojii gbada dà'ēē boluboāzo jee jii kōnzo. Wà jīina be dà'ēē kōn zeze.

Di Masa gbāia kii Hebelu neneni ni'ēshinaa shishi, ì dooni to Shifila, ì dooni kīn Pua. Ì kè'ēē: In a ni'ē Hebelu nenenian tandi, in nōgōnin, à ì de. In neneni kīn, à ì tó. Amaa nenenia be Lakii wasaa zo, di yáa tá ibe hē'ēē àta kea, àbi nōgōnia toa. Di kii be à shishi ì à làla ì kè: Budikpaaji aa kè lee à nōgōnia tòà? À jinshì'in à kè: Hebelu nenenia ba doo Masa neneniazoa, à hida, àta ni'ē daaji wà nu. Lee Isra'ilaã bi laakea, àbi dakekea. Di Lakii yāakè neneni ni'ēshinaa ben, ì à gbà nia, tá à ì wasaa zo. Di Fili'auna yáa tò ì gbāian kōn ì kè: Hebelu nihicēni nōgōnia à kaa Nilu i bii kōn, amaa à nenenia to.

Musa ēa

Lawi boii nōgōni Lawi boii neneni shì. Nenani be ni'ēgbēeshì ì ni'ē nōgōni. Tá ibe wà ni be yāazo, ì ì dùdu ha mō àa. Tá ìta zāia ì ì dùdu mōda, ì kembu sakani shì ì kōota kàa'ima, dun i ba gāaũ. Di ì ni be dàũ ì wèe ibe jè Nilu tabaaũ shēekāaũ. Ni be dēē gōō sa, ibi waa ho tá ì ì taa.

Fili'auna nene wèe zuuji Niluũ, di ì gbāia bi tabii Nilu leema. Ì sakani wà jeā shēekāaũ, di ì ì zōkeda jì, ì wèe ibe shì'in. Tá ibe lagò, ibe wà nihicēni diũ, ibi oa. Ì ì tosaimà ì kè: Hebelu ninōgōnin. Di ni be dēē nù ibe hē Fili'auna ni ben: Nn yaaji mà wee mà Hebelu neneni shishimii ì yōkпамii ni bema? Ì jinshì'in ì kè: Ee, ì wee Di nuhe be wèe ì ni be dō shishi.

Fili'auna nene be kè'in: Ì ni di shi ò wee'izo, ò ò katamee, má ò hindeboamii. Di ò ni be shì ò wèezo, ibi ò waa. Tá ni be gbakè, ò ò shì ò wèe'izo Fili'auna nene ben, di ò ò shì ò ni. Ì tokpà'in Musa, dun ò kè ò ò bò ò bii.

Musa baashì ò wèe Madia

Dii kee tá Musa gbakè, ò wèe ò boii Hebeluā waji, di ò jii gbada wà tá àbi kea. Ibe wà Masa nɔgɔni bi ò boii wēa. Tá ò gu wàwa lē ò sɔ, òta gbānkan waa, di ò Masa gbace be dè ò ò dà ciāaũ.

Tá gu dò, tá ò bò, ò Hebeluā wà hwaa, àbi jēekeea. Di gbān tá ò yāa ba yāazoa ò ò làla ò kè: Budikpaaji mbi n gbān doo wēa? Ì jinshì'in ò kè: Ji di n jè wa kii wa kiiweekeda? Nn yaaji ò ma de lata n Masa gbace be dèa? Di wasaa Musa kù ò kè: Wàa ho be dō fa

Tá Fili'auna yāa be mà, ibi gudēa ò Musa de, di ò baashì'in ò wèe Madia tēũ, ò zùtē lē igu'ēe sɔ gube. Madia sangakēda kee bee, ò nenea zo sɔhia, di ò nù ò ò tòtò ò kàa imiboũ ò je hubēenan. Tá tāahɔngɔnaa kāa nù ò àbi ò yaa, di Musa kpàtē ò gɔ̃ nenenia bezo, di ò ò kpà'ēē ò hoāma. Tá ò wèe ò je Leuweli gu, ò ò làla ò kè: Budikpaaji a shì sasaa kpāia? À jinshì'in ò kè: Masa nɔgɔni kee di wa shì tāahɔngɔnaama ha ò ò tòtò ò kpàwēē wa hoāma. Di ò ò làla ò kè: Ì bee mai? Budikpaaji a nɔgɔni be tò gube? À ò shishi ò nu ò hobeewazo. Musa nù, di ò yadakè ò zùtē nɔgɔni bezo, di nɔgɔni be ò nene Shipola kpà'ima. Ì ni'è nɔgɔni, di Musa tokpà'in Geesomu, ò kè ò ò bonun gbānkāa tēũ guii.

Tá ì diihwaakè, di Masa gbāia kii gà. Isra'ilaã bi ēeda zɔɔjii tá àbi kea yāaji, àbi oa, di à o be bòo Lakii gu. Ì à ēedaã mà, di ìta sāsā ì izoa tá bee Ibrahimō Ishiakazo Yakubuzo. Lakii Isra'ilaã wà, di ì à tosaimà.

Lakii Musa shishiã

Musa bi ì wēeni Yetolo Madia tē sangakeda hubēena hōngɔa, ì sàda gumasamaũ ha ì nù kasa tá wàta ke Holebu gu. Di Baanaje Mala'ika bò ì nù'ima celeniũ ēdebaaũ. Musa ēe be wà, ibe wà ce bi dɔa'ima, amaa ibai cekūaa. Di ì kè: Má wada mamaaki be waji, mà dō ho tá tò ēdebaa be bai cekūaa. Tá Baanaje wà ì nù waji, di ì leezù'iji ēdebaa beũ ì kè: Musa Musa Di ì jinshì'in ì kè: Maa gii Lakii kè'in: M̀ba nu kutua. Ǹ n baace bobo, dun gu tá n g̀ɔ̀ bee dabam. Di ì kè: Maakĩn n cĩina Ibrahimō Ishiakazo Yakubuzo Lakiin. Di Musa ootàta ì wiema, dun ì Lakii waa wasaamà. Di Baanaje kè: Ninde tá ma gbāia bi kea Masa maa wà, mɔɔ ma à o mà tá à nindekpanaa tò. Ma à wāa d̀. Īadikpaaji ma ìntē mà à shi Masa gbāiama, mà à bo tēe beũ, mà wee'àzo tēe taakinaje lagoãu, gu tá diō zɔɔzo bee dake, tēe tá Kanaana beeũ Hitiãzo Amɔliãzo Peliijiãzo Hiviãzo Yebushiãzo. Isra'ilaã oã b̀omama tandi, mɔɔ ninde tá Masa gbāia bi kpaà'ama maa wà. Ǹ wee tandi, ma n j̀ Fili'aunama, dun ì ma gbãn Isra'ilaã bo Masa. Di Musa hē Lakiin: Maakĩn jin tá mà wada Fili'aunama mà Isra'ilaã bo Masa? Lakii kè'in: Magōa

bee'nzo. Ìa sheedan tá ma n jĩ: In n à bò Masa, á ma shishia kasa be kiheũ.

Di Musa hè Lakiin: In ma wèe maa hè Isra'ilaãn ma kè à cĩina Lakii di ma jĩ'ama, in à ma lala n toji, bu má hea'èè? Lakii jinshì'in ì kè: Ma bee lata ma bee. Ì he'èè maakĩn ma n jĩ'ama. Lakii hè'in mɔɔ: Ì he Isra'ilaãn ì ke ma Baanaje à cĩina Ibrahĩ Ishiakazo Yakubuzo Lakii di n jĩ'ama. Ma to be diikɔn. Àgɔ ma shishia lee ha a boiinama. Ì wee ì Isra'ila gbãnkpasaã hakɔ, ì he'èè ma Baanaje à cĩina Ibrahĩ Ishiakazo Yakubuzo Lakii di bò ì nù'mma. He'èè mabi à waa, ho tá wàbi kea'èè Masa maa wà. Má à boa Masa, gu tá àbi nindekea be, má wada'azo tɛɛ tá Kanaana beeũ Hitiãzo Amoliãzo Pelijiãzo Hiviãzo Yɛbushiãzo, gu tá diɔ zɔzɔo bee dake. À n yáa maa. Miiakĩn Isra'ila gbãngbagbaanazo à wee Masa kii gu, à he'in ma Baanaje Hebɛluã Lakii maa di bò ma nù'ama, ma kè ì a gba zɛɛ à wee dii àa keji gumasamaũ, dun à sangake maa Baanaje a Lakiima. Maa dè tá Masa kii ba shia à weeda, sai ma wicẽmò'in. Má ootã Masa gbãiama, má ma mamaakiã kpaa'ima, sa'ai ì a zugaa. Má toa Masa gbãia à a tosaima, dun in ábi wada, ába wada oogegeeda. A neneni koji ì azuhwa ko lokocia adohoãzo tuhwaanazo zɛɛda ì Masa neneni dooma ì neneniãzo tá bee ì bama, sa'ai à gã a nɔgɔnian a neneãzo. Lee á Masa gbãia hoã shia'ama kɔnkɔn.

Lakii Musa gbaã mamaakikezεε

Musa jinshì'in ì kè: In àba ma yáa shia, in àba ma yāamaada, in à kè miiakīn ntà bo n nùmamaa kīn? Di Baanaje ì làla ì kè: Bu di n ooũ gube? Ì jinshì'in ì kè: Gaan. Baanaje kè'in: Ñ detεε tee. Tá ibe dètεε, di ì ladì maani, di Musa gàa kpεε. Di Baanaje kè'in: Ñ oobo ò kũ ì muuma. Tá ibe kũ, di ì ladì ì gò gaa ì ooũ. Baanaje kè'in: Lee n kea, à ta n yáa shi tá maakīn Baanaje à cīina Ibrahī Ishiakazo Yakubuzo Lakii di bò ì nù'mma.

Baanaje ladì ibe hè'in mɔɔ: Ñ oosɔɔ n tɔgɔũ. Di ì sòtɔũ. Tá ì bò, ibe wà kutu gee lòkoci ì ooma, ì gò hu doo abuzo. Baanaje kè'in: Ñ sɔdi ò oosɔɔ n tɔgɔũ. Ì ladì ì sòtɔũ. Tá ì oobò, ibe wà ì ladì doo yāazo. Baanaje kè'in: In àta n amincike à sheeda mahεbo shia, à sheeda kpεεbo shia. In àta sheeda hwaana be shia àta n yāama kīnda, ò Nilu i tɔɔ ò binde tee, ì ladia āma.

Di Musa kè'in: O'o Baanaje Tun yāa yāaheã ba aaha ma gua. Ko tun dii tá n yāahεmεε, ma lée bee gbitee. Di Baanaje kè'in: Ji di lée kè gbacen? Ji di ta ì leni εena ke ko ita ì gbāntu ke? Ji di ta to wà gu wa ko wà bīake? Maa Baanaje, ba maandaa? Ñ wee tandi Má oodaa'mma yāaheãzo, yāa tá n hea maa dadaamii. Di ì kè: O'o Baanaje N yāa yāazo Ñ gbānkee jī. Di Baanaje hūngà Musazo ì kè: N daji Haluna Lawi boii yee? Maa dõ tá yāaheã ba wia'izoa. Ibi nua kōtajì'nzo. In ì mi waa, ì zūu hukεa. Ñ yāahea'izo, yāa tá ì hea mi dadaa'in. Maakīn, má oo daa'ama yāaheãzo, ho tá á kea má dadaa'εε. Ì yāahea gbāian n madedi, ì

gõa n lée, ngõa bee'in doo Lakiizo. Ñ gaa di shi ñ kũ, ñ sheedaã ke'izo.

Musa sɔdiã Masa

Musa wèe ì wɛeni Yetolo gu, ì kè'in: Ñ ma gba zee mà wee ma gbãia gu Masa, mà wa in à bee bɛtekezo ha tandi. Yetolo kè'in: Ñ wee lahia. Daaji Baanaje hɛ Musan Madia tɛɛũ ì kè: Ñ kpatɛɛ ñ wee Masa, dun gbãia tá àbi n tobekɛa koyãa à gàga kɔn. Di Musa ì ne shì ì ninɔgɔnia bezo, ì à jè jekiã kpee, ì ladì ibi wada Masa, ì Lakii gaa be kũ. Di Baanaje kè'in: In n nù Masa, mamaaki tá ma ì iko kpà'mma ñ ke Fili'auna ɛ kɔn. Amaa má ì tɔla gbadakũa, ì gea gbãia toji. Ñ he'in maa Baanaje ma kè Isra'ila di ma ninɔgɔni mahɛbo, di maa hɛ'in ì ma nɔgɔni mahɛbo be zuga ì wee ì j̄ikemɛɛ. In ì ge ì zugaji, má ì ninɔgɔni mahɛbo dea tandi.

Zɛɛũ Musa bi ia gukee, di Baanaje ì lè gube, ì yaaji ì ì de. Di Shipola gbɛɛ hɛɛ shì ì ì ni hɔ̄zɛ̄ɛzo, ì ì zumba nà Musa gɛɛma ì kè: Inte, miia di ma zãa ãmanaje. Hɔ̄zɛ̄ɛna be yãaji ì kè, zãa ãmanaje. Di Baanaje Musa tò.

Baanaje hɛ Halunan: Ñ wee ñ kɔta Musazo gumasamaũ. Di ì wèe ì ì lè Lakii kasa gu, ì leekpà'ima. Ho tá Baanaje ì j̄i heji Musa ladì Halunan sheedaãzo tá ibe hɛ'in ì ke. Di Musa Halunazo wèe Masa à Isra'ila gbãnkpasaã hàkɔ. Yãa tá Baanaje hɛ Musan Haluna ladì'ɛɛ kɔn, di Musa mamaakiã be kè Isra'ilaã

εε. À yáa be shì. Tá à mà Baanaje di nù oodaji'àma ì à nindekeã wà, di à kùtee'in à εεz̄ tee.

Musa Halunazo wèe Fili'auna waji

Bee kpεε Musa Halunazo wèe Fili'auna gu à kè'in: Yáa tá Baanaje Isra'ilaã Lakii hèn di: Ì kè ò ì gbãia zuga à wee à salake gumasamaũ. Fili'auna jinshì'èè ì kè: Ji Baanaje tá mà εεz̄'in, mà Isra'ilaã zuga? Matà Baanaje d̄õa. Mába Isra'ilaã zugaada. Di à kè'in: Hεbeluã Lakii di bò ì nùwama. Ñ wa gba zεε wà wee wà dii àa ke gumasamaũ, wà sangake Baanaje wa Lakiima, dun iba gagee kaawēeda ko jēε. Di Masa kii be hè Musan Halunazo: Budikpaaji aa tò gbãia miiladi bi ladia à jīima? À s̄odi a jīima. Di ì ladì ì kè: Tá gbãia kè dake tandi, di a yaaji à usã à jīizoa?

Dii be Fili'auna yāajè Isra'ila wiecēkenaan à εekenaazo ì kè: Àba ua kpa'àma à bulo bo'izo lata ata ke koyāa m̄õda. À to à wee à ho kataji à ginde. Amaa à to à bulo bo dakeke doo lata àta bo koyāa. Àba labo'èeda, dun mi'ānaan. Ì yāaji tò àbi oa, àbi kea àa yaaji à wee sangakeji à Lakiima. À jīi laakea'èε, dun àba usāgu zoa à miiladi basheāma m̄õda.

Di à wiecēkenaa be à εekenaazo nù à kè'èε: Fili'auna kè iba ua kpa'aama m̄õda. À wee à hak̄õ a ginde gu tá aa waa. Amaa wába jīi laboa'ēeda, ko m̄ok̄õ. Di à kpàtee à wèe Masa komai ua shēε kēji. À wiecēkenaa be ta mama'aji gud̄ok̄õn, dun à à jīi yā, lata àta yā dii tá wàta ua kpa'àma. Isra'ila εekenaan tá à nindekpanaa à à jè, wà à hwàta wà kè'èε: Budikpaaji àta bulo bo

kpāia ko guma, ì bòo lata wà ì dakeke jè'ěe koyāada? Di Isra'ila eekena wèe à ò Fili'auna gu à kè: Budikpaaji mbi kea wāakīn n zɔɔkēnaan lee? Wàbai ua kpaawama mɔɔda, mɔɔ wàbi kea wà bulo bo. Wàbi wa hwataa, amaa n gbāia di tɔɔ zo. Di ì kè: Āa mi'ānaan. Lee di a bi Īadikpaaji atà ke á wada sangakeji Baanajezo. À wee jīikeji. Wàba ua kpa'aama mɔɔda, amaa á bulo boa lata wà ì dakeke jè'ěe.

Tá wàa hè Isra'ila eekenaan àba dii doo buloboā laboaa, abe d̄̄ à yāa wà tandi. Tá à bò Fili'auna gu, à kōtā Musazo Halunazo, àbi à dāa, di à kè'ěe: Baanaje a yāa wa tá aa kè, ì kiiwēeke'azo, dun aa tò Fili'aunazo ì gbāiazo ba yaa wa wusayāajia. A wa deā zee kpà'ama. Di Musa ladì ì wèe ibe hè Baanajen: Baanaje, budikpaaji n nindekpà gbāia beman? Bee yāaji n ma jīa? Tun dii tá ma wèe ma yāahè Fili'aunan n tozo, di ibi nindekpaa n gbāiama, nta à boa

Baanaje Isra'ilaā sheekūa yāajeā Musan

Di Baanaje kè'in: Ho tá má kea Fili'aunan ní waa tandi. Ì à zugaa ma gbada gba yāaji. Ì à yaa ì teeū ma gbada gba yāaji. Di Lakii ladì ibe hè Musan ì kè: Maa Baanaje, ma bò ma nù Ibrahī gu Ishiakazo Yakubuzo Gbadakōnnaje, amaa àta ma dōa tá ma to Baanajenda. Ma i bee'àzo ma kè Kanaa tee tá à beeū nubaā má kpa'a'ama. Ma Isra'ilaā ēedaā mà à zɔɔkeā Masa gbāian yāaji, mɔɔ matà sāsāa ma i be tá bee'àzozoa. Īadikpaaji ò he Isra'ilaān ò ke: Maa Baanaje, má a boa jīi gbadaū tá Masa gbāia dà'ěe, má

a zɔɔkeboa. Má kiiwεεke'ázo, má a zɔɔkeboa ma oo gbadazo. Má a shia à gɔ̃ ma gbãia, magɔ̃a a Lakii á dɔ̃a tá maa Baanaje a Lakii tá a bò Masa jii gbadaũ. Má wada'azo tɛɛũ tá ma jiidà Ibrahĩzo Ishiakazo Yakubuzo. Má a gbaa à gɔ̃ a bon. Maa Baanaje.

Musa yãa be hɛ Isra'ilaãn, amaa àta ì yãa maa, dun zɔɔjii zεzε à jiiakaka dè yãaji. Di Baanaje hɛ Musan ì kè: Ñ wee ñ he Masa kii Fili'aunan ì Isra'ilaã zuga à bo ì tɛɛũ. Di Musa jinshì Baanajen ì kè: Lata Isra'ilaã bata ma yãamaa, maa leegbiteenajen, la di Fili'auna ì ma yãa maa?

Musa Halunazo cĩina

Baanaje yãahè Musan Halunazo Isra'ilaã yãaji Masa kiizo, ibe hɛ'ɛɛ à bo Isra'ilaãzo Masa. Anun à cĩina baanaa. Isra'ila ninɔgɔ̃ni mahεbo Lubainu ninɔgɔ̃nia Hanɔki, Palu, Hezɔ̃nɔ, Kaamizo. Anun Lubainu boiina. Anun Saminu ninɔgɔ̃nia: Jemueli, Yamini, Ohada, Yakini, Zohaa, Kanaa neneni ni Sauluzo. Anun Saminu boiina. Adiina Lawi ninɔgɔ̃nia to à boiima: Geesɔ̃, Kohata, Melalizo. Lawi yɛɛ kè kasɔɔ nizo kadoowokoi wɔɔwɔ wohwaazo (137). Anun Geesɔ̃ ninɔgɔ̃nia à boiima: Libini, Shimeizo. Anun Kohata ninɔgɔ̃nia: Amalamu, Izaa, Hebelɔni, Uzielizo. Kohata yɛɛ kè kasɔɔ nizo kadoowokoi wo'aazo (133). Melali ninɔgɔ̃nia Mali, Mushizo. Anun Lawi boiina ẽmbũa'ẽmbũa.

Amalamu ì je dɛɛ Yokabedi shì ne, di ì Haluna ɛ'izo Musazo. Amalamu yɛɛ kè kasɔɔ nizo kadoowokoi wɔɔwɔ wohwaazo (137).

Izaa nɔgɔ̃nia Kola, Nefegi, Jikilizo. Uzieli ninɔgɔ̃an Misaeli, Elezafã, Shitilizo. Haluna Aminadabu ni Elisheba, Nasõ dako shì ne, di ì Nadabu è'izo Abihuzo Ele'azalazo Itamaazo. Kola nɔgɔ̃nia Ashii Elekana, Abiasafazo. Anun Kola boiinan. Haluna ni Ele'azala Putieli nene doo shì ne, di ì Finihasa è'izo. Adinna Lawi boii baanaan ěmbũa'ěmbũa.

Anun Haluna Musazon tá Baanaje hè'èe à Isra'ilaã bo Masa keeke. Adiina di yãahè Masa kii Fili'aunan, dun à Isra'ilaã bo Masa. Tá Baanaje yãahè Musan Masa, ì kè ã Baanajen, yãa tá ibi hea'in ì he Fili'aunan kɔ̃n. Di Musa hè'in ã leegbiteenajen, la di Fili'auna ì ì yãamaa?

Bala'i wokoi kpaã Masa gbãiama

Di Baanaje hè Musan: Ñ wa. Ma n kè Fili'aunan doo mazo, di n daji Haluna bee n yãaheda. Yãa tá maa hèmii kɔ̃n ì he n daji Halunan, ì hea Fili'aunan dun ì Isra'ilaã zuga à bo ì tɛɛũ. Amaa má ì tɔla gbadakũa. Má sheedaã mamaakiãzo kea Masa dake, amaa Fili'auna ba a yãa maada. Má ootɔa Masa gbãiama, má kiiwɛke'azo, má boa ma jẽena ma gbãia Isra'ilaãzo. In ma bò ma gbadazo Masa, má Isra'ilaã boaũ, Masa gbãia dɔa tandi maa Baanajen. Di Musa Halunazo kè lata Baanaje hè'èe. Dii tá à yãahè Fili'aunan, Musa yɛe kè kashi, Haluna kɔ̃n kashi wo'aazo.

Di Baanaje hè Musan Halunazo: In Fili'auna mamaakiho làla'ama, ì he Halunan ì ì gaa shi ì detɛe ì ɛɛ, ì ladia maani. Tá Musa Halunazo wèe Fili'auna gu, abe kè lata Baanaje hè'èe.

Haluna ì gaa shì ì dètɛɛ Fìlì'auna ɛɛ ì ɛɛkenaazo, di ì ladì maani. Di Fìlì'auna Masa wielagonaa tɛɛwɛkenaa shìshi, di à mamaakiho be kè lee kīn à tɛɛwɛkɛāu. Tá à koji ì gaa dètɛɛ, di à gaana be ladì maania mɔɔ, di Haluna gaa à boā mòmɔ. Fìlì'auna tōla gbada, ìta à yāa maa lata Baanaje hè.

Iā ladiā āma

Baanaje hè Musan: Fìlì'auna tōla gbada, ì gè gbāia zugaji. Ì wee ì ì ta lahū saazo, dii tá ibi wada Nilu, ìngō ì dāa lee Nilu sɔ gube. Ì n gaa tá ladì maani be kū, ì he'in ì ke, maa Baanaje Hebɛluā Lakii maa di ma n jī ì gu ì he'in ì ma gbāia zuga à wada jīikejimeɛ gumasamaū, amaa ha tandi ìta maa. Maa Baanaje ma kè, ho tá ì toa ì dō tá maa Baanajen di: In n Nilu i wè gaazo tá nn kū, ì ladia āma. Zōona tá bee i beū gagaa, Nilu i wusakɛa, Masa gbāia ba zāia à mia.

Di Baanaje ladì ibe hè Musan: Ì he Halunan ì ì gaa shi ì do Masa iā gu, à soona à ooniazò à isōonazo à igūazo kōn, à gōa āma. Āma gōa bee komai Masa, ko í tá bee à hēāu à taanazo kōn.

Di Musa Halunazo kè lata Baanaje hè'ɛɛ. Haluna ì gaa be shì ì Nilu i hwàta'izo Fìlì'auna ì ɛɛkenaazo ɛɛ, di i be gō āma kōn. Zōona tá beeū gāga, di Nilu i be wusakè, Masa gbāia ba zāia à mia. Āma bee komai Masa. Masa tɛɛwɛkenaa kè lee mɔɔ à tɛɛwɛkɛū, di Fìlì'auna tōla gbadakū, ìta à yāa maa lata Baanaje hè. Fìlì'auna ladì ì wè ì bà, ìta yāa be daa. Masa gbāia isōona

È'ē Nilu kəkɔcēma, dun à imi, dun àta zāia à Nilu ì mia. Ì bee lee ha dii sōhia Baanaje Nilu hwataã kpeε.

B̀̀ona bala'i

Di Baanaje h̀̀ Musan: Ǹ̀ wee ǹ̀ he Fili'aunan, maa Baanaje ma k̀̀ ì ma gbāia zuga à wee j̄iikejimεε. In ì g̀̀ è à zugaji k̄n, má toa b̀̀ona kaa ì tεema komai. B̀̀ona Nilu hwaa ha à sàda galla, à ḡa ì kpeεbataũ ha ì ke'iiboũ, à heeda ì intεeboma. À ḡa ì εekena kpeεbataũ ì gbāia kpeεbataãzo. À kaa ì tungbeãu ì gudaãzo. B̀̀ona heeda'ima ì gbāiazo ì εekenaazo k̄n.

Baanaje ladì ibe h̀̀ Musan: Ǹ̀ he Halunan ì ì gaa shi ì ǹ̀nɔ soonala ooniazo is̄̀onazo, b̀̀ona kaa Masa tεema. Tá Haluna ì gaa ǹ̀nɔ Masa iāla, di b̀̀ona b̀̀ è wàzã tεe beũ. Di tεewēkenaa be k̀̀ lee m̄̀w à tεewēkeũ, abe tò b̀̀ona kpàtεε Masala.

Di Fili'auna Musa Halunazo sh̄ishi ì k̀̀: À Baanaje zεε ì b̀̀ona katamama ma gbāiazo, má a gbāia zugaa à wee sangakeji'ima. Di Musa h̀̀ Fili'aunan: Ǹ̀ dii jemεε mà Baanaje zeemii n εekenaazo n gbāiazo, dun ì b̀̀ona katamii n kpeεbataãzo, à ḡa Nilu sh̄ish̄in. Fili'auna k̀̀: Lahũ. Di Musa k̀̀: Ì kea lata r̄n h̀̀ dun ǹ̀ d̄s gbānkan ba doo Baanaje wa Lakiizoa. B̀̀ona kataa'mma n kpeεbataãzo n εekenaazo n gbāiazo, à ḡa Nilu sh̄ish̄in.

Tá Musa Halunazo b̀̀ Fili'auna gu, Musa Baanaje z̀̀ε b̀̀ona yāaji tá ibe k̀̀a Fili'auna gu. Baanaje Musa zεena sh̄i, di b̀̀ona be g̀̀ga keãu kpeεbataãzo jeenazo. Wàa hàk̄k̄, di tεe wusak̀̀

kõn. Tá Fili'auna wà gu daamakè, ì tōla ladì ì gbadakù, di ìta Musa Halunazo yāa maa lata Baanaje hè.

Shée bala'i

Baanaje hè Musan: Ì he Halunan ì ì gaa shi, ì tē hwata'izo, kua ladia sheena Masa komai. Di abe kè lee. Haluna ì ì gaa shì ì tē hwàta'izo, di kua ladì sheena, à kàa gbāiaū sōnazo. Masa kua ladì sheena kōn. Tēwēkenaa māmā'ima lee à tēwēkēū mō, di à sò. Sheena kàa gbāiaū sōnazo. Di tēwēkenaa hè Fili'aunan: Lakii oogbeen. Amaa Fili'auna tōla gāgā gbada, ìta à yāamaa lata Baanaje hè.

Imbiā bala'i

Baanaje hè Musan: Ì kpatē sasaa ò wee ò Fili'auna ta dii tá ibi wada Nilu, ò he'in maa Baanaje ma kè ì ma gbāia zuga à wee ma jīikejimē. In ì gè à zugaji, má imbiā kaa'in ì ēkenazo ì gbāiazo ì baa keāzo. Masa keā hwaa imbiāzo, ha à tataa tēla. Lokaci be Goshē tēū gu tá ma gbāia beeū má boa ì kpe. Gube imbiā ba kaaūa, dun ì dō maa Baanajen ì tēū. Má ma gbāia banbankea ì gbāiazo. Lahū sheeda be kea.

Di Baanaje kè lee. Imbiā kàa Fili'auna kpebataū ì ēkenaa kpebataāzo. Masa wì kōn imbiā yāaji. Di Fili'auna Musa Halunazo shìshi ì kè: À wee sangakeji a Lakiima tēema guii. Di Musa kè'in: Wàba zē zo wà ke leeda, dun hoā tá wāa sangakeazo Baanaje wa Lakii gu Masa gbāian ta ì cēke. In wa

sangakè hoãzo tá bee'ëε cêε à εε, à wa hwahwaa gbεεzo à wa dεdε. Wá taa gumasamaũ dii àa, wá sangakεa Baanaje wa Lakii gu lata ibe hèwëε. Di Fili'auna kè: Má a zugaa à wee sangakeji Baanaje a Lakii gu gumasamaũ, amaa àba wee saa. À ì zεεmεε tandi. Musa kè'in: In má wee, má Baanaje zεεda, ì imbiã kataamii lahũ n εεkenaazo n gbãiazo. Amaa mba seseke ñ ge gbãiaji à wee sangakeji Baanajema mɔɔda. Tá Musa bò Fili'auna gu, ì Baanaje zèε'in. Baanaje ì yãa mà, di imbiã kàta Fili'aunama ì εεkenaazo ì gbãiazo. Ìta gǝ gukeeda, ko doo. Amaa Fili'auna tǝla gǝ gbada ha tandi, ìta à zugaa.

Hubεena gagaã

Baanaje hè Musan: Ñ wee ñ Fili'auna ta, ñ he'in Baanaje a Hebeluã Lakii kè, ì ma gbãia zuga à wee ma jǝikejimεε. In ì gè à zugaji ì à kǝa ha tandi, má ootǝa ì hubεenama jeeũ. Má gagee zεεε kaa ì busuãu ì jekiãzo ì kotosaanaazo ì diinazo ì tãanazo ì beenazo. Má Isra'ila hoã banbanke Masa hoãzo. Isra'ilaã hoã kan ba gaada. Maa Baanaje ma ì dii jè. Lahũ má kea tεεũ guii.

Tá gu dǝ, di Baanaje kè lee. Masa gbãia hubεena gàga kǝn, amaa Isra'ilaã hoã kan tà gàa. Fili'auna làla ho tá kè be, di ibe mà Isra'ilaã hoã kan tà gàa, amaa ì tǝla gǝ gbada, ìta gbãia be zùgaa.

Gyambo gãa Masa gbãian

Baanaje hè Musan Halunazo: À mɔɔyɔgu tuhuni kashi oozo, Musa hẽ laaũ Fili'auna εε, ì tataa Masa tεεla kǝn doo kuazo, ì

kaa gbāian sōnazo gyambo komai. Di à mɔɔɔɔgu tuhuni shì à wè'izo Fili'auna gu. Tá Musa tuhuni be hɛ̀ laaũ, di gyambo kàa gbāiaũ sōnazo. Tɛwɛ̀kenaa tà zāia à wèe Musa gua gyamboã be yāaji, dun ì à lè Masa gbāiazo kōn. Di Baanaje Fili'auna tōla gbadakũ lata ibe hɛ̀ Musan, di ìta à yāa maa.

Laagbɛɛ bāa

Baanaje hɛ̀ Musan: Ì kpatɛɛ sasaa ò wee ò Fili'auna ta, ò he'in maa Baanaje a Hebeluã Lakii ma kè, ò ma gbāia zuga à wee ma jīikejimeɛ. Di tandi má ninde kōn kpaaji ò ɛɛkenaazo ò gbāiazo, dun ò dō dunia kōn gbānkan ba gbadikpamazoa. Dun in ma ootō'ama ma gagee kàa'ɛɛ yāa, dun ò kīn ò gbāiazo à yā duniaũ. Maa tò ò bee dun ò ma gbada wa, ma to wazā duniaũ kōn. Lata ibi ò ginde shia laaũ ò dà ma gbāiala ha tandi, ibai à zugaada, lahũ leena maa toa laagbɛɛ zɛzɛ bā gbagba, laagbɛɛ tá ò ii tà kèa Masa yāada tun tá wàa jè ha kpāia. Ì he'in ò gbāia jī ò hubeena hoāzo tá ibe zo jeeũ ò shi ò kaka keũ kōn. Gbāia hoāzo tá bee guhu, in wàta gā'azo keũa, laagbɛɛ bāa'ama à gaga.

Fili'auna ɛɛkenaa kāa Baanaje yāa wasaamà, à à zɔɔkenaazo tàta keũ à hubeenazo. Amaa gbāia tá àta Baanaje yāadaa, à à zɔɔkenaa tò guhu à hubeenazo. Di Baanaje hɛ̀ Musan: Ì oo lakpatɛɛ laaũ, laagbɛɛ bāa gbāiama hubeenazo jee hoāzo Masa tɛɛ komai. Tá Musa ò gaa nònɔ laaũ, Baanaje tò laa bi payaa, laa bi bāa laagbɛɛzo, Lakii bi ceshia, mɔɔ Lakii bi sua tɛema. Baanaje laagbɛɛ kàa Masa gbāian. Laagbɛɛ bi bāa, Lakii bi

ceshia. Laagbɛɛ be zɛzɛ. Tun Masa tɛɛ bee, laa bee ii tà bāu yāada. Hoã tá bee guhu Masa tɛɛũ laagbɛɛ be à wiiwii kɔ̃n, gbāiazo hubɛɛnazo jee hoãzo kɔ̃n. Ì lateɛ agoã è'ɛɛ kɔ̃n. Goshɛ tɛɛ gu tá Isra'ilaã bee ì kpɛɛ laagbɛɛ be tà bāa.

Fili'auna Musa Halunazo shishi ì kè'èè: Di tandi ma asozɛzɛkè. Baanaje yāa yāazo, maakīn ma gbāiazo wāa tɔɔnaan. À ì zɛɛ. Lakiigīa laagbɛɛ bezo bòo. Má a zugaa tandi, wāba gea'ɛɛ mɔɔda. Musa kè'in: In ma bò hwaa kpɛɛ, mɔɔ ma ma oonòno Baanaje kawa, laagīaa gɔɔ, laagbɛɛ yāa, dun ò dɔ̃ tɛɛ Baanaje bon. Amaa maa dè miiakīn n ɛɛkenaazo, ábai Baanaje Lakii wasaa zoa ha tandi.

Nuga mashezo wii, dun nuga pàya mɔɔ mashe wasabò. Alkama wetezo tà wiida, dun àta ma kpɛɛzo. Musa bò Fili'auna gu ì wèè hwaa kpɛɛ, ì ì oo nòno Baanaje kawa, di laagīaa laagbɛɛzo gɔ̃ɔ, laa tà bà mɔɔda. Tá Fili'auna wà laa laagbɛɛzo laagīaazo gɔ̃ɔ, ì gāgā asozɛzɛkezo, ì tɔ̃la gbadakù, ĩakīn ì ɛɛkenaazo. Ì tɔ̃la gɔ̃ɔkè, ì gè Isra'ilaã zugaji lata Lakii kè Musan ibe hè'in.

Laabeena bala'i

Baanaje hè Musan: Ì wee Fili'auna gu, dun ma ì tɔ̃la gbadakù ì ɛɛkenaazo, dun mà ma mamaakiã be ke à gu, dun ò zāia ò he n nian n cīniazo lata ma Masa gbāia wicɛkè mamaakiãzo tá maa kè à gu, sa'ai aa dɔ̃ maa Baanajen. Di Musa Halunazo wèè abe hè Fili'aunan à kè: Baanaje Hebɛluã kè, ní gea ò ɛɛzɔ'in ha busaa? Ì ì gbāia zuga à wee à jiikejì'in. In n gè à zugaji, lahū ì

laabeenaa kaa n tɛɛũ, à tataa tɛɛma, wàba gu waada, à sooda hoãma tá gòmii laagbɛɛ kpɛɛ agoãzo kɔ̃n. À n keã hwa n ɛɛkenaa boãzo Masa gbãia boãzo kɔ̃n. N jeã n cīinazo àta ì ii wà yãada, tun dii tá à zùtɛɛ tɛɛũ guii ha kpãia. Di Musa ladì ì bò Fili'auna gu.

Fili'auna ɛɛkenaa kè'in: Gbãia be à bala'ikaawaji lee ha busaa? Ñ gbãia be zuga à wee Jīike Baanaje à Lakiin. Ntã dɔ̃ Masa wiidaa? Di wà ladì wà shì Musa Halunazo Fili'auna gu, ì kè'èè: À wee Jīike Baanaje à Lakiin. A jinu di à wada? Musa jinshì'in ì kè: Nia gbãnkpasaãzo. Wá wada wa kpɛɛ kɔ̃n wa nɔgɔ̃niazo wa nɛnɛazo wa tãanazo wa beenazo wa diinazo, dun Baanaje sala wábi wada keji. Di ì kè'èè: In ma a zùga a nɛnɛniazo a niazo a kpɛɛ, Baanaje a bo À miiladi A yaaji à hēmazo. Aa'a A nɔgɔ̃nia di wada Baanaje jīikeji, dun ìa di aa zèɛ. Di wà à yà Fili'auna gu.

Baanaje hè Musan: Ñ oonɔ̃ɔ̃ Masa tɛɛla, laabeenaa kaa, sa'ai shɛɛzo lalaãzo tá bò laagbɛɛ kpɛɛ à soa kɔ̃n. Tá Musa ì gaa nòno Masama, Baanaje bò ututuzo usasala kawa, àbi bŭa tɛɛ bema usɔ̃ bii gŭmɔ̃zo baa gɔ̃ɔ̃. Tá gu dè, usasala ututu be nù laabeenaazo. Di laabeenaa be nù à tàta Masa tɛɛma kɔ̃n. À dakeke ì dà yãa bola, ì ii ba kea kobusa mɔ̃da. À kpàtɛɛ tɛɛma komai, di tɛɛ shikè. Shɛɛna lalaãzo agoniazò tá bò laagbɛɛ kpɛɛ abe bèè kɔ̃n. Shɛɛ ko lala kan ba bee Masa tɛɛũ mɔ̃da.

Gube tanditandi Fili'auna Musa Halunazo shìshi ì kè: Ma asozɛzɛkè Baanaje a Lakiin azo kīn. À zŭukŭmɛɛ kù doo ma

asozezozo, à Baanaje a Lakii zεεμεε ì hasaake di katamama. Tá ì bò Fili'auna gu, ì Baanaje zèε. Di Baanaje bò ututu gbadazo egee kawa, ì nù ì laabeena shì ibe kàa Teku Cçu. Ko laabeeda doo tà gõa Masa mɔɔda. Baanaje Fili'auna tõla gbadakù, di ìta Isra'ilaã zùgaa.

Gushi tataã Masala

Baanaje hè Musan: Ì oolakpateε laaũ, gushi tá wà zāia wà oona'ima ì tataa Masala. Tá Musa oonòno laaũ, di gushi icĩ tàta Masala komai ha dii àa. Wàbata kō waa, gbānkan tà kpàteε ì gua ha dii àa be. Amaa guhu bee gu tá Isra'ilaã bee kōn.

Di Fili'auna Musa shìshi ì kè: À wee Jiikeji Baanajen a neneniazo a niazo kōn, amaa a tãanazo a beenazo a diinazo à à tó. Musa kè: Ì to wà wa sangakeboã kũ hoãzo ta wàta kaa ce bii à cekũ, dun wà sangake'azo wà Baanaje wa Lakiima. Sai wà wee wa hubeenazo, ko doo ba gõaa, dun à gu wá sangakeboã shia wà sangake'azo Baanaje wa Lakiima. Daaji wà boo gube, ho tá wá shia wà sangake'izo'ima wába dõa tõɔda. Baanaje Fili'auna tõla gbadakù, di ìta shia ì à zùgaa. Fili'auna hè Musan: Kpateε ì ma gba gu Mba to wa wie ke shi mɔɔda. Dii tá wa wieshikè kōzo, ñ gaa. Di Musa kè: Lata nn hè, mába wieshikea'nzo mɔɔda.

Masa nɔgõni mahεena gagaã

Koyãa Baanaje hè Musan ì kè: Má nindekpa Fili'aunama Masa tεεzo kù doo mɔɔ, sa'ai ì a zugaa. In ibi a zugaa, ì a yaa fa Ì he

gbāian à koji nɔgɔ̃ni nenenizo azuhwa hoāzo jinali hoāzo zεε à Masa zutεεjeāma. Má toa Masa gbāia Isra'ilaā tosaima. Musa kīn ì daaja zo Masa Fili'auna εekenaazo ì gbāiazo.

Di Musa hè Fili'aunan: Baanaje kè, gūmɔ gudoodooonii ì sadaa Masa tεεla, Masa ninɔgɔ̃ni mahεεboā gagaa kōn tun Fili'auna tá bee kubama ni ha neneni zɔkɛda tá àta wucici lɔ ni, hubεε ninɔgɔ̃ni mahεεnazo kōn. Oa gbagba dɔa Masama komai, ì ii tà kè yāada, iba kea kobusa mɔɔda. Amaa Isra'ilaā gu ko gbē ba leekεa gbace ko hubεεmaa, dun ì dō Baanaje Masa gbāia banbanke Isra'ilaāzo. N εekεnaa di nua ma gu kōn, à kutεεdameε, à ke mà wee ma gbāiazo kōn. Bee kpεε tandi má wada. Di Musa bò Fili'auna gu hūnga gbazo.

Baanaje hè Musan yāa ì kè: Fili'auna ba n yāa maada, sa'ai ma mamaakiā laakea Masa. Musa Halunazo mamaakiā be kè Fili'auna εε kōn, di Baanaje ì ì tōla gbadakū. Ì gè Isra'ilaā zugaji à bo ì tεεū.

Sadalaau sala

Baanaje yāahè Musan Halunazo Masa ì kè: Mɔɔ di gōa bee'εε mɔɔ mahεε yēyēεε. À he Isra'ilaān kōn, mɔɔ di dii wokoibɔabo baabaa kōn à tāa shi doodoo. In baa gbāia dakeke tà bòo à tāa doo soa, à shi baazo tá à bee lεε kō sɔ ì gbāia dake leekpεε, dun ì kutu ba gōaa. Tāasaa ko beesaa bɔtɔni shi tá ba gbāshī zoa. Isra'ilaā kōn, koji ì ì bo wa ha mɔɔ di dii wokoi woshiizobɔabo. À ì zēε egee, à ì āma hwata ke kpale kpataāma tá wà ì sōo soa,

ookpite kawazo oozεε kawazo laaũzo. Gũmɔ doo be à s̄o be kpa cema, à so kpanjic̄zo lala sebezɔ. Àba so bútu ko hiihiinaa. À kpa cema ì miizo ì ḡēnazo ì gb̄ε hoãzo. Àba to gudɔ ì kutumaa. In ì kutu ḡ, à kaa ce bii ì w̄. In ábi soa, à bæh̄i ee, à baace ḡ, a gaa k̄k̄, à so hidahida, dun Baanaje Sadalaaũ sangakεbon.

Gũmɔ be má sadaa Masama mà ninɔḡni mahεboã dεdε tεε beũ komai hubεε ninɔḡni mahεboãzo k̄n, má ȳawiida Masa jiiinama. Maa Baanajen. Āma be ḡa sheeda keãma tá a beeũ. In mabi oot̄a Masa gb̄iama, in ma āma be w̄, má sadaa'ama, gaga be ba a taada. À dii be je ma sala dun à bobo ì ȳazo, àḡ sala be kea gaado ha a boiima.

Kpanjic̄ sala

À kpanjic̄ so ha dii s̄hia. Ì dii mahεbo à yishiã tá bee a keũ bobo à detεε, dun gb̄n tá ho yishinaje sò dii s̄hia beũ, w̄ ì boa Isra'ilaã gu w̄ ì dε. Ì dii mahεbo ì dii s̄hiab̄abozo à hak̄ à ma j̄ike. Àba j̄i kan kea diina beũ, sai mabenakε, ì léε kpeε. À kpanjic̄ salake, dun dii be ma a b̄o Masa doo j̄ēnaazo. A boiina ḡ sala be kea gaado. M̄o mahεbo dii wokoï woshiizob̄abo igee, àḡ kpanjic̄ soa ha ì dii kadoo wodoonizo igee. Yishi ba bee a baa ha dii s̄hia, dun gb̄n tá yishi sò, bonu ko kpeeni w̄ ì boa Isra'ilaã gu w̄ ì dε. Àba ho yishinaje so dii bea. Gu tá aa beeũ k̄n, à kpanjic̄ so.

Sadalaau sala mahebo

Musa Isra'ila gbānkpasaā shishi kōn, ì kè'èè: À wee à a baa tãa shi, à zèe Sadalaau salakebo. À wusa kaka shi à gā āmaū tá bee heeū, à hwata kpale kpatama, ookpite kawa oozegge kawazo laaūzo. A gbānkan ba bo ì keūa ha gudɔ. In Baanaje bi sadaa teema ibi Masa gbāia dedea, in ì āma wà kpale kpatama, ì sadaa'ima. Iba toa mala'ika gbacededa gā'aji ì a dedea. Āakīn a boiinazo à yāa be kū gaado ha a boiima. In a gā tēū tá Baanaje ì a gbaa lata ì ì alkawalikè, à Lakii jīi be ke. In a nia Lakii jīi be ma'ana lāla'ama, à he'èè Sadalaau sangan tá wàta ke Baanaje gu, dun tá ì Masa gbāia dède, ì sàda wa Isra'ilaā keāma, ìta wa dède. Di gbāia kùtē Baanajen à eezò tē. Tá à wèe, abe kè lata Baanaje hè Musan Halunazo.

Masa ninɔgōni maheena gagaā

Gūmɔ gudoodooonii Baanaje Masa ninɔgōni maheena dède kōn tun Fili'auna tá bee kubama ni, ha kegushinia ni, hubee ninɔgōni maheenzazo kōn. Fili'auna kpàtē gūmɔzo ì ekenaazo Masa gbāiazazo kōn, di oā dè Masama, dun baa kee ba beeda gee bāa. Gūmɔzo Fili'auna Musa Halunazo shishi ì kè'èè: À kpatē à bo Isra'ilaāzo ma gbāiaū. À wee Jīikeji Baanajen lata aa hè. À a beena shi a tāanazo a diinazo lata aa hè. À gāgā, à sangayāakemē.

Masa gbāia bi maaaa gbāia beji à bo'èè à tēū hidahida, dun à kè: Wá gagaa kōn. Isra'ilaā à kpanjicē wucici tá abe yà kàa hēu

iba yishi zoa, à à tɔgɔã hĩhĩma abe jè à ẽema. Abe kè lata Musa hè'èè, à azuhwa hoãzo jinali hoãzo tuhwaanazo zèè Masa gbãia. Baanaje tò Masa gbãia à tosaimà, di abe kpà'ama. Lee à Masa gbãia hoã shi'ama.

Isra'ilaã dà zɛɛũ

Isra'ilaã dà zɛɛũ gẽezo, à dò Lamashɛzo à wèè Sukotu. Nɔgɔnia kpɛɛ kasɔw wokoi koi àa (,), nia neneniazò ba beeda. Nuba boiina doodo wè'azo dake mɔw. Beena tãanazo diinazo dake kè gba. À kpanjicè kè ì wucicizo tá abe yàa à b'izo Masa. Iba yishi zoa, dun wà à yà Masa àta gɔɔda. Àta mabena mà shi à bee zɛɛũa.

Isra'ilaã zutɛena Masa yẽe kè koi hwaa kadoo wokoi. Yẽe koi hwaa kadoo wokoi be kpɛɛ, sala be dii Baanaje jẽena be bò Masa kɔn. Gũmɔ be Baanaje bon. Isra'ilaã ta iicèkè'ima ha à boiima, dun gũmɔ be Baanaje Isra'ilaã boã Masa iicèkè.

Sadalaaũ sala dɔɔka

Baanaje hè Musan Halunazo: Idii Sadalaaũ dɔɔkan tá maa jè: Boii kee ba ì sɔw soa, amaa zòw tá aa lù ì hɔwzèè ì soa. Nuba ko jiiƙeda ba soa. À so keũ, àba bo ì sɔw bezò guhua. Àba tãa be awɛe kee ɛɛda. Isra'ila kɔn à sala be kea. In bonu bee a gu, ì yaaji ì Sadalaaũ salake Baanajen, ì hɔwzèè ì baa gbãian kɔn, ì gɔ tɛeni, sa'ai ì kea. Zumbanaje ba bea. Tɛeni bonuzò tá bee'azo,

dɔɔkayāa doo ben. Di Isra'ilaā kè lata Baanaje hè Musan Halunazo kɔ̃n. Dii be Baanaje Isra'ilaā bò Masa keekee.

Kpanjicē sala ninɔgɔ̃ni mahɛɛ kpaā Lakiimazo

Baanaje yāahè Musan ì kè: Isra'ila ninɔgɔ̃ni mahɛena hubɛɛ nɔgɔ̃ni mahɛenazo ò kparama, dun ma bon kɔ̃n.

Musa hè gbāian: Dii dii tá a bò Masa zɔɔkɛũ à bobo ì yāazo, dun Baanaje di a bò Masa ì oo gbadazo. Àba yishi so dii bema. Ábi boa Masa mɔɔ mahɛũ tá wàta ke Abibu kpāia. Baanaje alkawalikè a cīnan ì kè tee tá diɔ zɔɔzo dake mɔɔ Kanaana beeũ Hitiāzo Amɔliāzo Hiviāzo Yebushiāzo ì kè ì kpa'aama. In ì to à boo, à sala be ke mɔɔ diiũ. Àgɔ kpanjicē soa ha dii sɔhia. Ì dii sɔhiabɔabo gɔa bee'ɛɛ Baanaje sala. Àgɔ kpanjicē soa ha dii sɔhia be hwà. Yishi ko ihoka inje bagɔ bee baa kee a teeũ dii bema. Dii be à he a ninɔgɔ̃nian ábi bee kea ho tá Baanaje kè'ɛɛ dun ì a bò Masa. Sala be gɔ bee'ɛɛ sheeda doo be eena ooma ko bobobo eena ɛema, dun Baanaje dɔɔkayāa gɔ bee a leeũ, dun ĩa di a bò Masa ì oo gbadazo. Àgɔ dɔɔka be kea ì lokacima yɛyɛɛ.

In Baanaje tò à bòo Kanaa teeũ, in ì kpà'ama lata ì ì alkawalikè'ɛɛ a cīnazo, à a nɔgɔ̃ni mahɛena kpa'ima kɔ̃n sa'ai a hubɛɛ nɔgɔ̃ni mahɛena gɔa ì bon kɔ̃n. À a jeki nɔgɔ̃ni mahɛebo bo tãanizo. In ìta litokpaa, à ì koto hĩ à ɛɛ. À a ninɔgɔ̃ni mahɛena litokpa kɔ̃n. In a nɔgɔ̃nia a làla yāa be miiji lahũ à kè, ĩa bu yāan, à he'ɛɛ, dun Baanaje wa bò zɔɔkɛũ Masa ì oo gbadazo. Tá Fili'auna tɔlagbadakè ì gè wa zugaji, di Baanaje Masa ninɔgɔ̃ni

maheena dède kōn hubee nōgōni maheenazo kōn. Īadikpaaji wàta sangake'ima hubee nōgōni maheenazo, mɔɔ wàta wa nōgōni maheena litokpa. Bee gōa bee sheeda doo hozoo eena wa ooma ko ho eena wa eema, dun Baanaje di wa bò Masa ì oo gbadazo.

Isra'ilaã boã Masa

Tá Fili'auna Isra'ilaã zùga, Lakii tà bò'azo Filishitiã tee zeeŭa, ko ha ì kutukezo, dun ì kè: In wà kpateeda'àma jēezo, à bēkeea à ladi à wee Masa. Lakii lòkoci, ì gumasama zee shì'azo Tekucē kawa. Isra'ilaã bò Masa à jēekehoã kù.

Musa Yusufu gèe shì, ibi taa'izo, dun Yusufu tò Isra'ilaã jiidà yāa ì kè, in Lakii nua à boji, à ì gee awee shia à bo'izo gube.

Tá à bò Sukotu, à wèe à gaa kpākpā gumasama leema Etamu. Baanaje ta di à ee tasungbe shingeŭ usōobii, dun ì zee m'èe. Gūmɔ kīn, ita di à ee ce shingeŭ dun ì huk'e'èe, dun à tá usōobii gūmɔzo. Tasungbe be bata kata à ee usōobiida, ce be bata kata à ee gūmɔzoa.

Masa gbāia hombaã Isra'ilaãji

Baanaje hè Musan: Ñ he Isra'ilaãn à ladi à wee à gaa kpākpā lee Pihahilotu sɔ Migidolu zāaŭ tekuzo, àbi kō waa Ba'alizefōzo. À gaa kpākpā lee teku sɔ gube. Fili'auna bēedaa a sà, gumasama a m̀. Má ì tōla gōokea, sa'ai ì hombaa'aji, má toboa Fili'auna yāaji ì jēekenaazo, Masa gbāia dōa maa Baanajen. Di Isra'ilaã kè lee.

Tá wàa hẹ Masa kii Fili'aunan gbāia be baashì, di ãa ì ẹẹkenaazo zūu sòdì'ama à kẹ: La di wáa kẹ wáa tò Isra'ilaã bò zòkẹũ? Di Fili'auna guda ẹẹ ì busuma, ì ì jẹẹkenaa hàkõ. Ì busuguda yāanaa shì koi àa Masa busugudaāzo kōn, koji ì jẹẹnaa kiizo. Baanaje Masa kii Fili'auna tōla gōkẹ, di ì hombà Isra'ilaāji, àbi boa à mii lakpatẹda. Di Masa gbāia hòmba'aji Fili'auna busuāzo ì busugudaāzo ì busunaazo ì jẹẹkenaazo kōn, di àbi nua à kōta'aji à gaaũ lẹ tekũ sò Pihahilotu gu àbi kō waa Ba'alizẹfōzo.

Tá Fili'auna gaa kutu, Isra'ilaã wierzù, di à Masa gbāia wà àbi dōa à kpẹ. Wasaa à kũ gbagba, di à ò Baanajema. À kẹ Musan: Geebaa ba bee Masaaa? Budikpaaji n nùwazo gumasamaũ guii wà gaga? Budikpaaji n wa bò Masa? Watà hemii Masaaa? Wata kẹ ò wa to shìshīn wà zòkẹ Masa gbāiandaa? Zòkẹ'ẹẹ saabo wà gaga gumasamaũla. Musa kẹ'ẹẹ: Àba to wasaa a kũa. À gōo shìshīn, á waa lata Baanaje ì a sheekũa kpāia, dun Masa gbāia tá ábi à waa kpāia, ába à waa kobusa mōoda. Baanaje di jẹẹkea'ẹẹ. Àgō bee kitikiti.

Sadaã Tekucēla

Baanaje Musa làla ì kẹ: Bu ó mbi keamee? Ì he gbāian à kpatẹe tazo. Ì n gaa nōnō tekuma, ì gbiizo, sa'ai Isra'ilaã gāa ì zāaũ gu gegeeũ. Maakīn, má Masa gbāia tōla gōkẹa, dun à gāa à kpẹ, má toboa Fili'aunama ì jẹẹkenaazo ì busugudaāzo ì busunaazo. In ma tobò Fili'aunama ì busugudaāzo ì busunaazo, Masa gbāia dōa tandi maa Baanajen. Lakii Mala'ika tá di ẹ Isra'ilaān ladì ì

wèe ì bee à kpee, mɔɔ tasungbe shinge tá bee à ɛɛ ladì ì wèe à kpee à zãã Masa gbãiazo. Tasungbe be guhukè Isra'ilaän ì gushikè Masa gbãian, di à gbãnkan tà nu kutu ì gbãn doo gu gũmɔ bea.

Tá Musa oonɔnɔ tekuma, di Baanaje bò ututu gbadazo usasala kawa. Ì bũ ha gu dɔ, ì teku shì ì gbii ha gu gegee bò. Tá í gbii kɔ̄ji, di Isra'ilaã gãgã gu gegeeũ à sàda. Í kpata bò à ookpite kawa à oozegɛ kawazo. Di Masa gbãia hombà'aji. Fili'auna busuãzo ì busugudaãzo ì busunaazo kɔ̄n à dɔ à kpee tekuũ. Saazosazo Baanaje Masa jẽekɛnaa wà tun tasungbe shinge cenajeũ, di ì tò à tòsã. Ibe tò à busugudaã dà mɔgɔũ, ì tò à ta wiamà, di à kè: Wà baashi Isra'ilaän, dun Baanaje bi jẽekɛa'ẽwazo.

Baanaje hè Musan: Ñ oonɔnɔ tekuma, í tataa Masa gbãiaama à busugudaãzo à busunaazo. Di Musa oonɔnɔ tekuma, di i bi shia ì gbeeũ gudɔzo. Lata í bi shia lee, di Masa gbãia baashì à kɔ̄tà izo. Gube Baanaje tò teku kùku'àma. Í shì ì tàta busugudaãma busunaazo Fili'auna jẽenaazo tá gã tekuũ Isra'ilaã kpee kɔ̄n. À gbãnkan tà bò, ko doo. Isra'ilaã kɔ̄n à tà iã zããũ gu gegeema. Í kpata bò à ookpite kawa à oozegɛ kawazo. Dii be Baanaje Isra'ilaã shì Masa gbãiaama, di Isra'ilaã Masa gbãia be gèena wà teku kɔkɔcẽma. Baanaje gbada gba tá ibe mò Masa gbãian, tá Isra'ilaã wà, à ì wasaamà, di à ì amincikè ì zɔkɛda Musazo.

Musa lee

Di Musa Isra'ilaãzo kõn lee di shì Baanajen à kè:

Má leeshia Baanajen, dun ì tobò,
ì busunaazo à busuãzo kàa tekũ.
Baanajen ma gbada,
má ì saabukpaa, ãa di ma sheekũ.
Ãa di ma Lakii,
má ì toshishia.
Ãa di ma je Lakii,
má ì to boa.
Baanaje jëenajen, ì to Baanaje.
Ì Fili'auna busugudaã ì jëekenaazo kàa tekũ,
ì jëenaa kiina kà'ĩ Tekucẽu.
Í be tàta'àma,
à ishìntee doo gbẽezo.
Baanaje, n ookpite n gbada to bò,
Baanaje, n n gaajeã lóló n ookpitezo.
N n gaajeã mèn n daaja gbaũ,
n hũngà, n à dèttee doo shẽezo.
N ñigàa, di i kpàtee,
ì gũũ doo kpatazo,
teku i ì ì gudoodooonii.
Wa gaabajeã be kè,
à hombaawaji à wa kũ,
à wa hoã shiawama lata à yaaji,

à à hēesaana boa à wa dēdezo.

N n wε bũ, di teku tàta'àma,
à ishìntεε doo dalamazo i gba beũ.

Baanaje, ji di doo nzo jiinaũ?

Ji di doo nzo?

Mamaakikeda, n kpasake dabam,
n daaja ta to wasaa wa kũ.

N n ookpite nònɔ, di tεε à mòmɔ.

N dì εε wa gbãian tá n wa bò zɔɔkεũ n indakεũ,
n wèewazo n tεεũ n gbadazo.

In boii kãa ma, à lugbegbea,

Filishitiã tεε gbãia zũukataa.

Edɔmu kiina lugbegbea,

tosai gãa Mɔabu εshinaan,

Kanaa tεε gbãia kaka gagaa kɔn.

Wasaa gba ì à kũa, à zũukataa,

à gɔa kitikiti doo gbεezo n gbada gba yãaji Baanaje,
ha wa gbãia gãgã tá n wa kè n bon.

Baanaje, ní wadawazo kasama tá nn bòbii n bon,

ní wa kaashekihea gu tá nn jè n baaũ,

n zutεεgu tá nn kpãkpã n ginden.

Baanaje kiikea diikɔn.

Tá Fili'auna busuã ì busugudaãzo ì busunaazo gã tekuũ, di
Baanaje shì izo ì tàta'àma, amaa Isra'ilaã tà gu gegeeũ teku
gudoodooonii. Di annabi Miliamu, Haluna dēε, ceki shì, di

nenenia bò à dò'ima kōn, àbi cekiwēa, àbi bee'oa. Miliamu leeshi'èè ì kè:

À leeshi Baanajen, dun ì tobò,
ì busunaazo à busuāzo kàa tekui.

Í tēhē

Musa dà zēū Isra'ilaāzo, à kàta Tekucēma à gā Sulu gumasamaū. À tà dii àa gumasama beū, àta i taa. Tá à nù gu tá wàta ke Mala, àta zāia à ì i mìa, dun ì tēhē. Īadikpaaji wà tokpà gu ben Mala. Di gbāia yāakàa Musaji à kè: Bu wá mia? Musa ò Baanajen, di Baanaje ago m̀'ìn. Tá ibe zù i bii, di i be eheekē. Gube Baanaje d̀okayāa jè'èè ì à gbadikpà ì kè: In a zūu'̀ntēē maa Baanaje a Lakii ma yāama m̀o ho tá ma yaaji ábi kea, in yāa tá maa jè áa mà aa ma d̀okayāa kù kōn, gee tá maa kàa Masa gbāian mába ì kee kaada'amaa, dun maa Baanajen a ēda. Bee kpēē à bòo Elimu, gu tá isōo bee wokoi wohwaazo dabinu agoāzo ka'aa wokoi. Di à gaa jè lēē i s̀o gube.

Mana bubulijiāzo

Isra'ilaā kpàtēē Elimu kōn, di à bòo Shini gumasamaū tá bee Elimu zāaū Shinaizo Dii wokoi ẁs̀o m̀o hwaabōabo à bò Masa. Di à yāakàa Musaji Halunazo gumasamaū gube kōn, à kè'èè: Budikpaaji Baanaje tà wa dēdē Masaa? Gube wata zutēē wata hobee s̀ozo ha wà kā, di a nù wa dēdēji ǹozo gumasamaū guii.

Baanaje hè Musan: Beena laaũ má mabena hēa'ēε, gbāia bo à dii doo bo hakõ lata gu bi ḍa à dakeke leekpεεma, dun mà à gbadikpa in à ma ḍɔkayāa kũ. Dii ṣobodooḅɔabo dii hwaaḅɔabo à hakõ, à ì mabena ke. Di Musa Halunazo hè'èε k̄n: Kpāia igee aa ḍɔa Baanaje di ì a b̄o Masa, lahũ saazo á Baanaje daaja waa. Yāa tá aa kàa'iji ibe mà, dun wába hokanda tá a yāakàawaji. Musa ladì ì kè: Baanaje a gbaa s̄ɔ à so kpāia igee, lahũ saazo ì mabena kpa'aama a dakeke leekpεεma, dun ì lito mà tá aa kàa'iji. Wába hokanda. Baa wāa a yāakàawajia, Baanajen.

Di Musa hè Halunan: Ñ he Isra'ilañ k̄n à nu kutu Baanaje gu, dun ì à yāakaana mà. Tá Haluna bi yāahea'èε, à wadò gumasama kawa, di abe wà Baanaje daaja b̄ò'ama tasungbe shingeũ. Di Baanaje yāahè Musan ì kè: Ma Isra'ilañ yāakaana mà. Ñ he'èε kpāia igeeshizo à s̄ɔ soa, lahũ saazo à hobeeda à k̄a, sa'ai à ḍɔa maa Baanajen à Lakii.

Kpāia igee bubulijiã nù à tàta à gaama. Tá gu d̄ò hii kpà ì lòkoci à gaaji. Tá hii s̄ò, di ho ḡò jeã tεεma hu katekate doo z̄ɔbakazo. Tá Isra'ilañ wà, abe hè k̄n: Idia bun? Dun àta d̄ò bunda. Musa kè'èε: Idia mabenan tá Baanaje kpà'ama à be. Ḍɔka tá Baanaje jè'èen di: A koji hakõ ì dakeke leekpεεma. À hakõ a koji miima kumbu doodoo a baa gbāia leekpεεma. Isra'ilañ kè lee. Abe h̄akõ, gbānkāa ho gbagba, gbānkāa ho katekate. Wà dabo dàũ, dun gbān tá h̄akõ gba ì bo ba hēa, m̄ɔ gbān tá h̄akõ kate ì bo ba gandedea. Musa kè'èε: Gbānkan ba ì

kutu to ha saazo. Gbānkāa tà Musa yāamaa, à ì kutu tò ha saazo, di kəkōnia kàa ì bù, di Musa hūngà gbāia bezo.

Lata gu bi dɔa koji ta hakō ì dakeke leekpɛɛma. In usōo gbadakū, ho tá gō tɛɛ ita yɔɔ. Dii sɔbodoobōabo à mabena hākō kù hwaa, koji miima kumbu hwaahwaa. Di à gbānkpasaā wèe abe hè Musan kōn. Ì kè'èè: Lee Baanaje jè. Lahū usādiin, Baanaje diin. Ho tá a yaaji à kpatɛ à kpatɛ. Ho tá a yaaji à hiihii à hiihii, ì kutu tá gō à je ha saazo. Abe jè ha saazo lata Musa hè. Bee tà bŭa, kəkōnia tà kaada. Di Musa kè'èè: À bee kpāia, dun usādiin, ába taa gukee kpāiaa. À hakō ha dii sɔbodoo. Dii sɔhiabōabo usādiin, iba bee dii bea.

Dii sɔhiabōabo gbānkāa bō hakōji, di àta taa. Di Baanaje hè Musan: Dɔɔkayāa tá maa jè ha busaa á gea dɔji'ima? À dō maa Baanaje di usādii jè'èè. Īa di tò dii sɔbodoobōabo mata dii hwaa mabena kpa'ama. Koji gō bee ì gbeeū, gbānkan ba bo gu tá ì bee dii sɔhiabōaboa. Di à usā dii sɔhiabōabo. Isra'ilaā tokpà mabena ben Mana. Ì doo wu hu kateāzo. Ì i ehee doo kpanjicē zɔɔnajezo.

Musa kè: Idii yāan tá Baanaje jè: Wà mana kumbu doo je wa boiinan, mabena tá ibe kpàwama wáa bèe gumasamaū wa boā Masa kpɛɛ dun anunkīn à wa. Di Musa hè Halunan: Ì kò shi ì mana kumbu doo kaaū, ì je Baanaje ɛɛ, dun igō jeā wa boiinan. Di Haluna jè lɛɛ gbɛɛ alloā sɔ, dun igō jeā lata Baanaje hè Musan. Isra'ilaā mana bèe yē kahwaa ha à bōo tɛɛū tá gbāia

beeũ. À mana be bèe ha à bòo Kanaa tɛɛ leema. Kumbu kù doo galan gbiina.

Í boã gbɛɛũ

Isra'ilaã kpàtɛɛ Shini gumasamaũ kɔ̃n, àbi tataa gugu lata Baanaje hɛ'ɛɛ, di à wɛɛ à gaa jɛ Lefidimu. Àta i taa gube abe miã, di à yãakàa Musaji à kɛ: N̄ wa gba i wà mi. Ì kɛ'ɛɛ: Budikpaaji ábi yãakaadamaji? Budikpaaji ábi Baanaje lée gudɛa? Tá àbi imijĩ maa, di à yãakàa Musaji à kɛ: Budikpaaji n wa bò Masa? N yaaji n̄ wa dɛdɛ imijĩizo wa niazo wa hubɛɛnazona? Di Musa ò Baanajema ì kɛ: La di má kɛa gbãia bezo? Ì gɔ̃ mɔkɔ̃ à ma hwahwa gbɛɛzo à ma dɛ. Baanaje kɛ'in: N̄ Isra'ila gbãnkpasaã hakɔ̃, à di ɛɛ gbãia ben. N gaa shi tá n Nilu hwàtazo. Magɔ̃a n ɛɛ lee Holebu kasa sɔ gube. N̄ gbɛɛ be hwata, í boa, gbãia mia. Di Musa kɛ lee Isra'ila gbãnkpasaã ɛɛ. Di wà tokpà gu ben Masa, dun gube à Baanaje lée gudɛ à kɛ: Baanaje beewazo gubea? Wà tokpà gu ben Meliba mɔɔ, dun Isra'ilaã yãakàakaa gube.

J̄ɛkɛã Amalekiãzo

Amalekiã n̄ j̄ɛkɛji Isra'ilaãzo Lefidimu. Di Musa hɛ Jɔshuan: N̄ gbãia bobiiwɛɛ, à wee à j̄ɛkɛ Amalekiãzo. Lahũ má gɔ̃ɔda kasa di miima Lakii gaazo kũa. Jɔshua kɛ lata Musa hɛ'in, ì wɛɛ j̄ɛkɛji Amalekiãzo. Di Musa Halunazo Huluzo shia kasa be miima. Kobusa Musa ì oo lakpàtɛɛ, Isra'ilaã ta Amalekiã bee,

amaa kobusa ì ì oo ìntεε kīn, Amalekiā ta Isra'ilaā bee. Tá Musa oo zè, di wà gbεε shì wàa jè ì hīi, ì zùtεema, di Haluna Huluzo à ì oo kùkū, gbān doo ookpite kawa, gbān doo zεge kawa, di ì oo gò lakpatεede ha usō sò. Di Jōshua bèe jēezo Amalekiāma, ì à dèdε hēesaazo.

Baanaje hè Musan: Ì yāa be kē lalahuma à gō bobobo, ì he Jōshuan, dun má Amalekiā yāa duniaū kōn. Musa sangakegu bō, di ì tokpàn Baanaje ma tuta ì kè: À Baanaje tuta lakpatεε laaū, Sa'ai Baanaje jēekeā Amalekiāzo diikōn.

Yetolo weena Musa waji

Musa wēeni Yetolo, Madia sanga ho tá Lakii kè Musan ì gbān Isra'ilaāzo, lata Baanaje à bō Masa. Musa ì ne Shipola tò kpεε yāa ì ninōgōni hwaanazo. Ì doo to Geesomu, dun Musa kè ìa tεε kee guii bonun. Ì doo to Eliεzεε, dun Musa kè ì je Lakii oodà'ima, ì ì bō Fili'auna hēesaa leema. Di Yetolo kpàtεε ibi nua Musa gu ì niazō ì nezo gu tá ì gaa jè lεε Lakii kasa sō gumasamaū. Ì lakpalekè Musan ì kè: Mabi nua n gu n nezo n ni hwaanazo. Musa bō ì kōtā ì wēenizo, ì kùtεε ì leekpà'ima. À kō lahia làla, di à gā keū. Ho tá Baanaje kè Fili'aunan Masa gbāiazo Isra'ilaā yāaji ibe ladī'in kōn nindeāzo tá ì à tà zεēū kōn, lata Baanaje à bō. Yetolo zūu kè hu yāa yāama tá Baanaje kè Isra'ilaān kōn, lata ì à bō Masa gbāia ooū. Di ì kè: Wà Baanaje saabukpa, lata ì a bō Fili'auna ooū Masa gbāiazo. Maa dō tandi Baanaje gbake dà baanaje kāala kōn. Tá Masa gbāia

gindemàma'ama, ibe m'è'è. Di sanga tá wàta ì ho kaa ce bii ì wã Yetolo kè Lakiima sanga kãazo mɔɔ. Di Haluna Isra'ila gbãngbagbaanazo kɔn à nù hobè'izo Lakii ε.

Kiiweekena kpa Isra'ilaãma

Tá gu dè Musa zùtεε ibi kiiweekεa'èε, à gɔɔ ì gu tun saazo ha igee. Ho tá ibi kea'èε tá Musa weeni wà kɔn, di ì ì làla ì kè: Bu mbi kea gbãia bezo lee? Budikpaaji mbi kiiweekεa'èε n ginde, koji gɔɔ n gu tun saazo ha igee? Musa jinsh'ìn ì kè: Gbãia ta nu ma gu à Lakii leeda ta. Kobusa in à yãakate zo, àta nu ma gu mà yáa be kpãkpã'èε, mà Lakii dɔɔkayãa he'èε tá ibe jè.

Musa weeni kè'in: Ho tá mbi kea ba yãazoa. N' zãa, gbãia tá bee'nzo zãa mɔɔ, dun jii be dà'nla, mba zãia n ke n doa. N' ma yáa ma tandi, má n gbaa yáa, Lakii gɔ bee'nzo. Ngɔ bee gɔɔda'àzo, n' wee à yãazo Lakii gu, dɔɔka tá Lakii jè n' dada'èε, zεε tá yãazo à shi n' m'è'è hozo tá à kea. Gbãia zãanaa amincinaa tá Lakii wasaa zo àbata ñiso shi n' bobii à bii, n' à je gbãia kasɔ wokoi εkenaa gbãia kasɔ bozo gbãia kahwaa wokoi bozo gbãia wokoi bozo àgɔ kiiweekεa gbãia ben diikɔn. À nua n gu ho wianaazo kɔn, amaa à ho mɔkɔnia kiiweekεa à ginde. Leen à n aso laboamii. In Lakii yadakemii in nn kè lee, mba sooda, gbãia be wada kpεε lahia.

Musa ì weeni yãamà, ì kè lata ibe h'è'in kɔn. Ì gbãia zãanaa b'òbii Isra'ila boiinan kɔn, ì à jè gbãia kasɔ wokoi εkenaa gbãia kasɔ bozo gbãia kahwaa wokoi bozo gbãia wokoi bozo. Di àta ho

kiiwεεke'εε diikōn. Ho wia àta nuzo Musan, di àta ho mōkōnia
kiiwεεke à ginde. Musa wèe ì gōō ì wεenin, di ì wèe ì tεεū.

Lεε Shinai kasa sō

Isra'ilaã boã Masa mōō aabōabo dii mahεε à kpàtεε Lefidimu. Tá
à nù Shinai gumasamaū, di à gaa jè gube lεε Shinai kasa sō.
Musa shìa ì wèe Lakii gu kasa be miima, di Baanaje leezù'iji ì kè:
N̄ yáa dii he Yakubu boii Isra'ilaãn: Áa wà lata maa kè Masa
gbāian, lata ma a shì ma nù'azo ma gu, lata kúu ta ni shi ì
gambama. In a ma yāamà ma i ta bee'azo yāazo tandi, ágōa ma
gbān yaanaa boiinaū kōn. Ko tá dunia bee ma bon kōn, ágōa
beemεε kiina sangaāzo ma gbāiazō tá bee dabam. Adiaã yāanan
tá n̄ hea Isra'ilaãn.

Musa ìntεε ì gbānkpasaã shishi, di yáa tá Baanaje hè'in ibe
ladì'εε kōn. À jinshì'in kōn à kè: Yáa tá Baanaje hèwεε kōn, wá
kea. Di yáa tá abe hè Musa wèe ibe ladì Baanajen. Baanaje kè'in:
Má nua n gu gigije iciiū, dun dii tá mabi yāaheamii, à wa yáa
maa, à n amincikea diikōn. Di yáa tá gbāia hè Musa ladì
Baanajen. Di Baanaje kè'in: N̄ wee à gu, n̄ he'εε à gbāshībo à
gindema kpāia lahūzo, à à tuhwaana heehee, àgō bee shiiū
lahūke, dun ì dii aabōabo má intεeda mà gōō Shinai kasa miima
koji wiedawie. Leekpεε je'εε kasa be kiheaū ha ì lōkociji kōn, n̄
he'εε à miiladi, àba shia kasa bema, ko à gbānkan ba oonamaa.
Gbān tá oonàma, wà ì de. Wàba oona'ima, wà ì hwahwa gbεεzo

ko wà ì zōzō kàazo wà ì dε. Hubεε ko gbace, dole ì ga. In abe mà wà béε bù wà ì bũ gàa, à nu kutu kasa be gu.

Musa ìntεε kasa bema ì nù ì gbāia be gu, ibe hè'èε à gbāshībo à gindema à à tuhwaana heehee. Ì ladì ì kè'èε: Àgō bee shiīū dii aabōabon. Àba intεε nenεnizoa. Tá gu dō ì dii aabōabo be, di laa bi payaa Lakii bi ceshia, mɔɔ laaū shikè kasa miima. Tá à béε ó gbada mà, di gbāia tá bee gaaū wasaamà kōn, àbi lugbegbea. Musa bò'àzo gaaū, ì wèè'àzo Lakii gu, di à gōō kasajī lεε kasa be sɔ. Tasungbe kùtεε Shinai kasama dun Baanaje ìntεε'ima cezo. Tasungbe be kpàtεε doo mɔɔyɔgu tasungbezo, mɔɔ kasa be bi lugbegbea kōn. Béε ó gbada bi laakea. Tá Musa yāahè, di Lakii jinshì'in laagīaaū.

Baanaje ìntεε ì gōō Shinai kasa miima, ì Musa shìshi, di ì shìa ì wèe gube. Baanaje kè'in: Ìntεε ì kulaladi gbāia bema, àba sada leekpεema à nu ma wajia, dun à gbān dakea ba gagaa. Ko sangaā tá àta nu ma gu kutu, à gbāshībo à gindema, dun màba à dèdèa. Musa hè Baanajen: Àba shiaada, dun n kulaladīwama n kè wà leekpεε da kasa be kiheaū, dun ì gō n bon. Di Baanaje kè'in: Ìntεε ì Haluna shi ì nu'izo, amaa sangaā gbānkāazo ba sada leekpεema à nu ma gua, dun màba à dèdèa. Di Musa ìntεε gbāia be gu, ì yāa be hè'èε.

Baanaje yāajeā wokoi

Lakii yāa dii hè kōn ì kè: Maa Baanaje a Lakii, ma a bò zɔɔkεū Masa.

Àbagõ baanaje kãa zoa, sai maa.

Àba hokan ii ke à kutεε à zɔɔkenda, ho tá bee laaũ ko tεε ko í bii, dun maa Baanaje a Lakii, mabata gandede shia. Jeã tá ba yaamajia mata hozeze kaa à boiinama ha à tɔlakũnaa à kraasosɔsɔkpanaazo. Gbãia tá yaamaji à ma yãajeã kũ kĩn, má indakea'ẽε ha à boii leekpεε.

Maa Baanaje a Lakii àba ma to shi togoa, dun gbãn tá ma to shì togo, mába toa ì bo togoa.

À usãdii dõ ma bon. A jee jĩi a jĩi kõnzo à ke dii sɔbodoo, ì schiabõabo gõa'ẽε usãdii, dun maa Baanaje a Lakii ma bon. Àba jĩi kee ke dii bea, ãakĩn ko a nɔgõni ko a neneni ko a zɔkeda nɔgõni ko neneni ko a hubεε ko nuba tá bee a bà. Dun dii sɔbodoo ma laaũ kè duniazoo tekuzoo hoã tá beeũzo kõn, di ma ùsã ì dii schiabõabo. Ìadikpaaji ma abaakakàa usãdii ben, maa jè ma bon.

À a jezo a dõzo gbãnkpasake, dun à diihwaake tεema tá maa Baanaje a Lakii mabi kpa'aama.

Àba gbacedea.

Àba i gbãnkee nezoa.

Àba kpãnji'oa.

Àba bushe je a zuteejenda.

Àba a zuteeje baa dangakea. Àba ì ne dangakea ko ì zɔkeda nɔgõni ko neneni ko ì dii ko ì jeki ko ì hoã kõn.

Koji laagīaa mà bēe'ozo, à Lakii ceshiã wà tasungbezo dɔ kasa miima, di wasaa à kù, àbi lugbegbea, à gǔɔ sa. Abe hè Musan: Ñ yāahewēe n ginde, wá maa. M̄ba to Lakii yāahewēeda, dun wàba gagaa. Musa kè'èe: Àba to wasaa a kūa, dun Lakii nù a gbadikpaji, dun à ì wasaa zo, àba asozezekea. À gǔɔ sa, di Musa nù kutu gigije shii gu, gube tá Lakii bee.

Baanaje sangakegu yáa

Di Baanaje hè Musan: Ñ yāa di he Isra'ilaän: A gindema aa mà lata ma yāahè'èe tun laaũ. Àba jii kãa ke à namamaa. Àba azuhwa ko jinali alamuke jiinaa. À ma sangakegu bo mɔgɔzo, à sangakema tãanazo diinazo, sanga tá wàta ì ho kaa ce bii à wã saabukpasangazo. Gu tá maa jè'èe à ma toshishi, má nua a gu, má abaakakaa'èe. In ábi ma sangakegu be boa gbeezo, àba ke gbēenazo tá wà kɔsɔkèa, dun in a kpasani kihema, ì laboã. Àba ma sangakegu bo à ì shiagu kea, dun a hīitogo ba bomaa.